

**Zeitschrift:** Schwyzerlüt : Zyttschrift für üsi schwyzerische Mundarte  
**Band:** 20 (1958)  
**Heft:** 1

**Rubrik:** Us em Buechli "Onderem Freudebäärg"  
**Autor:** [s.n.]

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

**Download PDF:** 22.11.2024

**ETH-Bibliothek Zürich, E-Periodica, <https://www.e-periodica.ch>**

## Us em Buechli «Onderem Freudebäärg»

### Föh im Meerz

*Es suuset und bruuset über de Hang,  
s will Früelig wäärde, s goht gwöß numme lang.*

*De Föh singt oms Huus, und er fahrt über d Wees,  
rüeft wüßi Stäärnli scho vöre n im Gräas.*

*Denn bloost er und raschlet im Buechehaag  
und schöttlet und röttlet, sovil er no maag.*

*«Ehr tüere Blätter, jetz muend ehr halt goh,  
s neu Läbe will öberaal vörechoo!»*

### Ooschterglogge

*Vo ale Törme vo dr Stadt  
töönt fürlechs Gloggeglüüt.  
Häll sings und klingts ob jedem Huus:  
S ischt Ooschtersonntig hüt!*

*Die Gloggestimme wandred wüt  
dors Taal und d Heng doruuf  
und schwinged sich denn tüüff und voll  
zum blaue Himmel uuf.*

*Vil Mentsche losed freudig zue,  
und mengi Seel zücht mit —  
E grooßi, stilli Ooschterfreud  
hööch ob de Tächer lüt.*

### Mit Blüemli

*E Chöörbli voll Blueme  
e Gscheenkli ganz chlii,  
e Häärzli voll Glöckwünsch,  
das ha n i för dii!*



## D Sonneblueme

*I han e Soomechörnli gsteckt  
im Gäärtli henderem Huus,  
es güggsled bald zwei Blättli  
zur bruune n Äärde n uus.*

*Die wieged sich im Früeligswind;  
ei, stoht mis Pflenzli schöö!  
Und wenns lang nöd go rägne choont,  
tue n i n em ztrinke gee.*

*Wie wachst mis Sonneblüemli schnäll  
im waarme Sonneschii!  
Im Sommer isch es wörklech scho  
grad e so groß wie n ii.*

*Im Herbst, doo ischt de Stengel hööch,  
kum sieh n i zuenem uuf;  
s hät zoberst obo, — oh wie schöö! —  
e großi Blueme druf.*

*Sie lüüchtet goldgäl i dr Sonn,  
daß me s wüt säche cha;  
e Finkli setzt sich uf de Haag  
und stuunt da Wonder aa.*

*Ischt au de Himmel trüeb und grau,  
luegt si zum Fenschter ii;  
fascht meint me, s hei im Gaarte  
e bitzli Sonneschii.*

## Chinderfäschtmorge

*I schwinge min Fahne,  
so fescht i no maag;  
vor Freud möcht i juuchze,  
s ischt Chinderfäschttaag!!*

*D Sonn luegt uf üs abe  
mit goldigem Schii,  
hüt taar e kei Wölkli  
am Himmelszält sii.*

*Vom Cherchtorm, vom hööche,  
do flattred im Wind  
di schöne vier Fehne  
und grüeßed üs Chind.*

*In Gasse häts Flagge  
a fascht jedem Huus;  
di ganz Stadt hät hüt Sonntig,  
siet fäschttäglech uus.*

*Es schmättred d Trompeete,  
und d Pauke fallt ii;  
mer züched dor d Strooße  
im Sonneschii.*

*I schwinge min Fahne,  
so fescht i no maag;  
vor Freud möcht i juuchze,  
s ischt Chinderfäschttag!*

## Chinderfäschtlied

(För di grooße Maitle)

*Mit Blueme n und Girlande,  
im frische, wiiße Kleid,  
mit Juble n und mit Singe  
send mer zum Fäscht bereit.*

*O wiite, blaue Himmel,  
o Fäschtwees, mer send doo,  
siend dei de See üs lüüchte  
und döt de Sentis stoh.*

*Es spilt hööch i de Flagge  
en frische Morgewind  
und striicht om heiße Bagge,  
denn goht er wiiter gschwind,*

*streift üsri Stäab und Bender  
und bloost ganz lüüchli drii;  
i ale Faarbe lüüched s  
im hällschte Sonneschii.*

*Voll Glanz und Faarb und Blueme  
luegt s Läbe rings üs aa,  
drom wemmer singe, tanze  
und Freud im Härze haa.*

*Chomm, Musik, üs go spile  
zum Reige n i dr Sonn!  
Bald ischt de Taag vergange,  
grad wie n en schöne Tromm.*



### Schlette!

*Juhui, o lueg wie hät da gschneit!  
Jetzt ischt de Weenter choo,  
drom hammer gschwind us sim Versteck  
de Schlette vöregnoo.*

*Mer stüged mit hööch uf de Bäarg,  
ein Glanz ischt öberaal;  
de Sentis strahlet, tüüff verschneit  
liit onne d Stadt im Taal.*

*Mer setzed uuf und fahred aab  
und suused dor de Wald;  
ganz root winkt d Sonn üs no dor d Bömm:  
«Gschwind hei, ehr Chind, s weerd chaalt!»*

### Vor dr Wienacht

*O Wienacht, heilegi Wienachtszit,  
chomm mit dim hälle Schii!  
Züch ii is Häärz vo jung und aalt,  
liebs Chrischtchind, chomm, züch ii!*

*Mer tuend denand so mengmool weh  
und mached vil verchehrt,  
und a dr Liebi fählt's üs au —  
Du häsch üs anderscht glehrt.*

*O zönd doch au i jedem Häärz  
en Funke Liebi aa,  
und hälff, daß jede Mentsch de Wääg  
zum andre fende cha!*



### **Vom Himmel bischt uf d Äärde choo**

*O du mis Chind, schlooff ii, schlooff ii!  
S Latäärnli brennt mit mattem Schii.  
Voll stillem Dank lueg i di aa.  
O Wonder! Wär das fasse cha!  
Mis Chindli, schlooff uf Heu und Stroh!  
Vom Himmel bischt uf d Äärde choo.*

*No sieh n i, wie z mittst i dr Nacht  
en Engel lüsl i d Töör ufmacht;  
häll stoht er vor dr Chammerwand,  
e wüßi Ilge n i dr Hand.  
Mis Chindli, schlooff uf Heu und Stroh!  
Vom Himmel bischt uf d Äärde choo.*

*Sethäär ha n i nünt anders teenkt;  
deer ha n i ali Liebi gscheenkt.  
Do bischt zum Läbe du vertwacht,  
häll ischt mer jetz di tunkel Nacht.  
Mis Chindli, schlooff uf Heu und Stroh!  
Vom Himmel bischt uf d Äärde choo.*

*O du mis Pfand vom Himmelriich!  
Wie bi n i so uusäglech riich!  
Und ischt die Hälli no för müi?  
I glob, si weerdet för ali sii.  
Mis Chindli, schlooff uf Heu und Stroh!  
Vom Himmel bischt uf d Äärde choo.*